



14/2/74

PLEASE DO NOT REMOVE
CARDS OR SLIPS FROM THIS POCKET

UNIVERSITY OF TORONTO LIBRARY

GR
335
L42
1875


Li, Shih
Hs po wu chih

East Asia


續博物志



EAST ASIAN LIBRARY
RM 8049 ROBARTS LIBRARY
UNIVERSITY OF TORONTO
TORONTO, CANADA M5S 1A5



續博物志



GR
335
L42
1875



光緒紀元夏月湖
北崇文書局開雕

續博物志卷一

唐隴西李石撰

張華述地理自以禹所未志且天官所遺多矣經所不載以天包地象緯之學亦華所甚惜也雖然華倣山海經而作故略或曰武帝以華志繁俾芟而略之余所志視華歲時綿歷其有取于天而首以冠其篇次第倣華說一事續一事不苟於搜索與世之類書者小異而比華所志加詳

爾雅旣曰釋天不得不略言其趣凡有六等一曰蓋天文見周髀如蓋在上二曰渾天形如彈丸地在其中天包其外猶如雞卵白之繞黃楊雄桓譚張衡蔡邕陸績王肅鄭玄之徒竝所依用三曰宣夜舊說云殷代之制四曰昕天昕讀爲軒言天北高南下若車之軒吳時姚信所說五曰穹天云穹隆在上虞氏所

說六曰安天晉時虞喜所論鄭注考靈曜云天者純陽清明無形聖人則之制璿璣玉衡以度其象如鄭此言則天是太虛本無形體但指諸星運轉以爲天耳

天圍圓三百六十五度四分度之一按考靈曜云一度二千九百三十二里千四百六十一分里之三百四十八周天百七萬一千里者是天圓周之里數也以圍三徑一言之則直徑三十五萬七千里此爲二十八宿周迴直徑之數也然二十八宿之外上下東西各有萬五千里是爲四遊之極謂之四表四表之內并星宿內總有三十八萬七千里然則天之中央上下正半之處則一十九萬三千五百里地在于中是地去天之數也

日有九道故考靈曜云萬里不失九道鄭注引河圖帝覽嬉云黃道一青道二出黃道東赤道二出黃道南白道二出黃道西

黑道二出黃道北日春東從青道夏南從赤道秋西從白道冬北從黑道

律歷志云角一十二度亢九氏十五房五心五尾十八箕十一斗二十六牛八女十二虛十危十七營室十六壁九奎十六婁十二胃十四昂十一畢十六觜二參九井三十三鬼四柳十五星七張十八翼十八軫十七此三百五度二十八宿之度也丑爲星紀初斗十二度終于婺女七度子爲玄枵初婺女八度終于危十五度亥爲姤訾初危十六度終于奎四度戌爲降婁初奎五度終于胃六度酉爲大梁初胃七度終于畢十一度申爲實沈初畢十二度終于井十五度未爲鶉首初井十六度終于柳八度午爲鶉火初柳九度終于張十七度巳爲鶉尾初張十八度終于軫十一度辰爲壽星初軫十二度終于氏四度卯

爲大火初氏五度終于尾九度寅爲析木初尾十度終于斗十一度

漢律歷志以前歷上元泰初四千六百二十七歲至元豐七年復得闕逢攝提格之歲中冬孟康曰言復得者上元泰初時亦是闕逢之歲歲在甲曰闕逢在寅曰攝提格此謂甲寅之歲也然則乙卯曰旃蒙單闕丙辰曰柔兆執徐丁巳曰強圉大荒落戊午曰著雍敦牂己未曰屠維協洽庚申曰上章涒灘辛酉曰重光作噩壬戌曰玄默閹茂癸亥曰昭陽大淵獻甲子曰闕逢困敦乙丑之歲曰旃蒙赤奮若

正月得甲則曰畢隴二月得乙則曰橘如三月得丙則曰脩病四月得丁則曰圉余五月得戊則曰厲臯六月得己則曰則且七月得庚則曰窒相八月得辛則曰塞壯九月得壬則曰終玄

十月得癸則曰極陽十一月得甲則曰畢辜十二月得乙則曰橘涂

八分二十八宿爲十二次晉灼曰太歲在四仲則歲行三宿太歲在四孟四季則歲行二宿二八十六三四十二而行二十八宿十二歲而周天是歲星年行一次也

山海東荒經云太荒之中有山名曰大言日月所出有波谷山者有大人之國又云大荒之中有山名曰合虛日月所出有中容之國

河圖括地象云二儀氣分伏者爲天偃者爲地

物理論云水土之氣升爲天

廣雅云東方蒼天東南陽天南方炎天西南朱天西方成天西北幽天北方玄天東北變天中央鈞天

五經通義云天神之大者曰昊天上帝其佐曰五帝

淮南子曰日出暘谷浴于咸池拂于扶桑是謂晨明登于扶桑

是謂朏音斐明至于曲阿是謂朝明臨于曾泉是謂早食次于桑

柎是謂晏食臻于衡陽是謂禺中對于昆吾是謂正中靡于烏

次西南山谷是謂小還至于悲谷是謂晡時回于女紀是謂大還經

于泉隅是謂高春頓于連音爛石是謂下春至于悲泉是謂懸車

薄于虞泉是謂黃昏淪于蒙谷是謂定昏曰入崦嵫落棠山經細

柳入虞泉之汜蒙谷之浦垂景在樹端謂之桑榆

呂氏春秋曰白人之南建木之下曰中無影蓋天地之中也

漢書云日立夏夏至行南方赤道曰南陸立秋秋分行西方白

道曰西陸立冬冬至行北方曰北陸分則同道至則相過晦而

見西方謂之朏朔而見東方謂之朧亦謂之側匿朧健行朧縮遲

周官天星皆有分野角亢氏兖州房心豫州尾箕幽州斗女揚州虛危青州室東壁并州奎婁胃徐州昂畢冀州觜蠆參益州東井輿鬼雍州柳星張三河翼軫荊州

鄭司農云保章氏五雲之物二至二分觀雲色青蟲白喪赤兵荒黑水黃豐東方朔別傳云凡占東畔當視天有黃雲來如覆車五穀大熟青致兵白致盜烏黑多水赤火

京房風雨占候曰黑雲如一疋阜二日中一日大雨二疋五日雨三疋十日雨

易緯曰八節之風謂之八風呂氏春秋云東北曰焱風亦曰融風東曰滔風東南曰薰風南曰巨風西曰颺風西北曰厲風北方曰寒風

王充論衡曰圖畫之工圖雷之狀如連鼓形又圖一人若力士

謂之雷公使左手引連鼓右手椎之春秋震夷伯之廟謂劈歷破之是也霹靂俗字也

梁太后信兄冀誅杜喬李固雷震憲陵寢屋

太平之時十日一雨一歲三十六雨

晉中興書曰甘露降耆老得敬則松柏受之尊賢容眾則竹葦受之一曰天酒

虹依雲陰而晝見于日衝無雲不見大陰亦不見

炎帝赤精之君火官之臣大庭氏也

明皇在長安詔一行鑄渾儀及太衍歷先是漢洛下閎云此歷後一千年差一日有聖人出而正之至是果一千年因以一行爲聖人僧一行本名璿俗張氏後出家改名敬賢遷化詔起塔銅人原諡大惠禪師并御製碑八分書

二十八宿爲其有二十八星當度故立以爲宿推測者多變如畢有十七度半觜半度星旣不當度自不當用爲宿星度皆以赤道爲法黃道則有邪有直與赤道不等

劉知幾曰兩曜日星麗于天象非如九州萬國廢置無常故海田可變而景緯無易必欲刊之國史施于何代不可也史記書有天官讀者竟忘其悞班固天文志非漢事而隸入漢書已乖越矣且如熒惑退舍宋公延齡中台告圻晉相速禍星集潁川而賢人聚月犯少微而處士亡如斯之類志之可也若乃體分濛濛色著青蒼丹犧素魄之躔次黃道紫宮之分野旣不預于人事乃編之于策書又曰天文有志何不爲人形志乎太歲在丑乞漿得酒太歲在巳販妻鬻子藕生應月閏月益一節芋以十二子爲衛亦應月之數也

俗以五月雨爲分龍雨一曰隔轍雨

雲五色爲慶三色爲禱或曰外赤內青爲禱楊雄曰紫蜺禱雲
明園曰君子小人竝進也

郭璞曰蓬飛磴則天風春則天雨蓬蠓也傳曰雷不蓋醬令人
腹中雷鳴月上下弦之時觸醬輒壞里俗忌之

自古帝王五運之次有二說鄒衍以五行相勝爲義劉向則以
相生爲義漢魏共尊劉說

關東西風則晴東風則雨關西西風則雨東風則晴

陽之專氣爲霽陰之專氣爲霰

中國有洞天三十六所皆謂之天第一王屋山洞天周回萬里
名小有清虛天其次委羽山洞天周回萬里名大高空明天其
次太玄總真天其次三玄極真天其次寶仙九室天其次上玉

清平天其次珠明耀真天其次金壇華陽天其次左神幽虛天其次成德隱玄天皆仙人所居也

木與木相摩則然金與火相守則流陰陽錯行則天地大絃於是乎有雷有霆木中有火乃焚大槐人間往往見細石形如小斧謂之霹靂斧或謂云霹靂楔按玄中記云玉門之西有國山山上有廟國人歲歲出磧數千名霹靂磧給霹靂用從春至秋乃罷禮記有雜金鑽牛骨鑽鑽與磧同音相合切

京房易傳曰四方常有大雲五色具而不雨下有賢人隱

狔將風則踴鼃欲雨則鳴

漢博士劉熙曰豫井兗冀以舌腹言之天顯也在上高顯也青徐以舌頭言之天坦也坦然高而且遠也

續博物志卷

終

續博物志卷二

漢明帝爲太子樂人以歌四章贊之一曰日重光二曰月重輪
三曰星重曜四曰海重潤

鯨魚者海魚也大者長千里小者數千丈一生數萬子常以五
月六月就岸生子七月八月導從其子還大海中鼓浪成雷噴
沫成雨水族驚畏莫敢近其雌曰鯢大者亦長千里

禽經曰鵝飛則蜮沈鵝鳴則蛇結又曰鸛俯鳴則陰仰鳴則晴
白蟻聞竹雞之聲化爲水竹雞自呼泥滑滑是也或曰白雞之
雄亦能化白蟻

鸛性甘帶每遇巨石知有蛇卽如術士禹步其石防然而轉南
方學其法伺其養雛緣木以篋絙縛其巢鸛必作法解之乃于
木下鋪沙印其足迹而倣之

暮鳩鳴卽小雨朝鳩鳴卽大風

物有異體而相制者翡翠屑金人氣粉犀北人以鍼敲冰南人以線解茶

高誘注淮南子云方諸大蛤也熟摩拭令熱以向月則水生許慎說文曰諸珠也方石也

有一國王小夫人生一肉團大夫人妬之作木函棄之恒河水後河邊人得之肉破生千小兒勇健欲伐父王國小夫人以乳五百道射小兒口遂弛弓仗號爲賢劫千佛

帝嚳有四妃一生帝摯一生帝堯一生商之先一生周之先商後封于宋都商丘今上于前朝作鎮睢陽洎開國號大宋又建都在大火之下宋爲火正按天文心星爲帝王實宋分野天地人之冥契自古罕有

孔子生于魯襄公二十二年

老君其母曾見日精下落如流星飛入口中有娠七十二歲而生于陳國渦水李樹下剖左腋而生長一十二尺

佛者本號釋迦文卽天竺釋迦衛國王之子于四月八日夜從母右脇而生有三十二相當周莊王九年魯莊公七年夏四月恆星不見夜明是也

龍脂得火可以燃鐵

佛以三月十五日夜出家二十九出家三十五得道

寧國論云蜀中本無獠犍爲德陽山谷洞中攘攘而出轉轉漸大自爲夫婦而益多夫土乾則生蚤地溼則生蚊積穀則生蠹腐肉則生蛆蛆化爲蠅蠅自生蛆蛆又生蠅豈有窮乎

日月蝕而私者生兒則多疾日月晦朔弦望而私者生兒則愚

癡瘡鉤絞了戾逐陣而私者生兒多凶暴無禮亦猶木日造
麴而酸水日造醬則生蟲九焦日種穀則不生芽六合日遭鬼
鬼不去火日安蜂則蜜苦土日種麻則不生
塵尾能留紅掃氈氈不蠹

馳糞煙殺蚊壁虱

李衛公言鵝驚鬼鳩鵲火孔雀辟惡

水母生兒無目龜鼈生兒無耳

桐廬人嘗伐竹遺竹見一宿竿雉頭蛇身猶未變乃知竹爲蛇
蛇爲雉頭先化曾於青城山小路上見之

鶴所以壽者無死氣于中也

河水東北有石室室中若有積卷因謂之積書巖每見神人往
還世人不悟其爲仙者又謂之神鬼彼羌目鬼曰唐述因名其

山曰唐述山堂曰唐述窟道術之士多往棲焉

巫咸山在安縣東南巫咸右手操青蛇左手操赤蛇羣巫所從上下大荒西經曰巫咸卽巫盼巫彭巫姑巫真巫孔巫抵巫謝巫羅

先提山有鈎蛇長七八丈尾末有歧蛇在山澗水中以尾鈎舐上人牛食之水傍瘴氣特惡氣中有物不見其形其作有聲中木則折中人則害名曰鬼彈郡有罪人徙之禁防不過十日死也

真菊可以延齡堃菊可以瀉人張華云黃精益壽鈎吻殺人是已

子程子曰昔洛陽北部有母旣生子病不能自舉乳求他婦負哺之子嬰及孩母疾不問子長不識所育負哺者盜其愛二母

卷二
三
忿鬪於庭子佑負哺者而反疎其生母

有人爲山魃所祟或教以爆竹如除夕可弭人用其言獲安問之則曰此荆楚歲時記以辟山魃鬼陰冷之氣勝則聲陽以攻之

蕙蒲者其狀如蓬枝多葉少根根如絲葉如扇不搖自動風生主庖廚清涼驅殺蟲蠅以助供養堯時生于庖廚爲帝王去惡孫柔王充白虎通皆云太平時蕙生于庖廚中煨一炬火爨一鑊水終日不能熱倚一尺冰置之熱廚終夜不能寒

師曠奏清角有鶴集廊門延頸而鳴飾翼而舞今世有馴養之鶴聞歌曲拊掌而舞者習之也

正月上辰出水邊盥濯食蓬餌以祓邪漢儀也

雛烏形類鴉烏純黑而背紅亦曰阿雛烏烏鴉反哺爲慈烏腹

下白不能反哺爲鴉鳥白頭羣飛爲鷺鳥大而白頭爲倉鳥卑居爲楚鳥又鴉鳥爲賈鳥莊子曰鴉賈也

相家說人臣得龍之一體當至公相曾公亮得龍之脊王安石得龍之睛

魚勞則尾赤人勞則髮白

鱣黃魚口在頷下無鱗長鼻軟骨俗謂玉板長二三丈江東呼爲黃魚

細魚得鱖不如啖茹

南越志曰烏鰂懷墨而知禮江東人或取其墨書契以給人初書迹如淡墨逾年墨消空紙耳

抱朴子蟾蜍壽至千歲者頭上有角頷下有丹書八字

裴顧崇有論曰鳥無胃肺蛤蜊無臟蛭以空中而生蠶以無胃

而育

眊抱者鴈鵠鵠鵠也影抱者龜鼈龜鼈也

視鵠制極觀魚制帆

神和子姓屈突名無爲字無不爲張詠布衣時遇之

海蟾子姓劉名昭遠華山陳搏館之道院與种放往來

廣德先生杜光庭處州人仕唐爲內供奉避亂入蜀王氏爵爲

師臣

爾朱先生僞蜀廣政中飲酒食猪臠渝州刺史謂其幻惑以竹
籠沈之江至夔爲漁人所得上昇

嚴補闕得青金丹方朱桃稚薛稷圖其形傳于世

呂洞賓謂侯生曰蛇蝎天地淘以自然之氣使之生以遂性殺
此救彼有損無益取紙隱語三口共一室室畔水偏清乃呂洞

賓字

陳希夷先生一睡或半歲或三數月近亦不下月餘留藏真息
飲納玉液吾睡真睡也曾與毛女游

鯉魚大小竝三十六鱗

蛭能跳入虎耳中見鵲便自仰腹受啄

水蛭亦如魚子經三年得水猶活

蛇蛻塞兩耳治瘡疾覆盆子是莓子竿取汁合成膏塗髮不白
麋鹿非八卦辰屬不葷臙能溫補于人生死無尤道家聽用爲
脯

天寶中河南緱氏縣太子陵仙鶴觀每年九月三日夜有道士
一人得仙已有舊例至日具姓名申府張竭忠爲令不之信陰
令二勇士執兵覘之至三更有一黑虎入觀來銜一道士射之

不中棄道士而去令於是申府請弓矢大獵石穴中格殺數虎或金簡玉錄冠帔髮骨甚多其觀遂廢爲陵使之居也

晉元康中梁國女子許嫁而夫戍經年不歸女家更强以適人尋病亡夫還問安所在夫徑至墓開棺女遂活因與俱歸後壻聞之詣官爭之王導曰此非常事不可以常理斷之宜還前夫惠帝世杜錫家葬婢誤不得出後十年開塚耐葬而婢尙生初婢之埋年十五六及開冢更生猶十五六嫁之有子

太和中育開周世冢得殉葬女子數日而有氣數日而能言郭太后愛養之又太原人破棺得一生婦人視其墓木可三十歲南方水凝其大如槩類鼻涕聞人氣則閃閃而動墮人體成瘡以射香朱砂塗之愈

續博物志卷二終

續博物志卷三

禹長九尺九寸湯長九尺孔子長十尺文王長十尺伍子胥長一丈眉間一尺韓王信八尺九寸金日磾八尺二寸東方朔九尺三寸王莽時奇士巨毋霸長一丈大十圍本出於蓬萊魏咸熙大人見襄武長二丈腳跡三尺二寸苻健皇始四年有長人身長五丈是月霖雨河渭汎溢中流得大屐一隻長七尺三寸屐指長尺餘

漢武故事東郡送一短人長七寸曰巨靈光武時潁川張仲師長二寸東方朔曰西北荒中有小人長七寸朱衣立冠鵠國男女皆長七寸海鵠吞之腹中不死

子華子曰黃帝之治天下也其精微之感蕩上沈而下浮爲百福之聚是百神受職於庚也帝乃採銅鍊剛質也登彼首山就

高明也作大鑪者鼓陽化神鼎者熟物之器也上水而下火二氣升降以相濟中和之氣也羣龍者眾陽之氣雲者龍屬也帝鄉者靈臺之闕而心術之變也弓裘衣冠者帝之所以善世救俗之具也甚矣世之好怪也後世必有人主好高而慕大以久生輕舉爲羨慕者左右狡詐希寵之臣又從而逢之是將甘心於黃帝之所造也

玉局觀洞高駢帥蜀取罪人以繩絆其腰令探淺深繩兩日方絕出青城山洞天觀門

巫山道士黃萬護以符藥救人蜀王建召之鋪草席水面泝流而上一日至成都

李德裕好餌雄朱有道士自云李終南笑曰此是世間凡火服之反促壽因出一玉象子狀如拳曰此可求勾漏瑩徹者燃香

致象鼻下勿令婦人雞犬見之三五日象自服之卽復吐出乃可服此火玉太陽之精凝結已三萬年以相公好道因以奉借唯忠孝是念無自貽咎又出金象云此是雌者貴其相伴不爾玉象飛去德裕服之有異乃於都下探聘名姝至百數不止象砂不復吐後南遷再遇道士怒甚索二象是夕風雨濤瀨并作玉象如團火飛出船德裕死於朱崖

顏真卿遇道人陶八八授以碧霞丹餌之曰七十上有厄如有卽吉後爲盧杞所陷縊死希烈敗返葬狀貌如生徧身金色爪甲出手背鬚髮皆長數尺人咸異之後有商人遇之於羅浮山寄書至偃師顏氏守塋者曰此先太師親翰書法蠶頭馬尾真得仙也

唐武宗四年官市郎巾有疑爲狼筋者有老僧云貧道昔曾以

一千於賈胡市得三枚狀如巨蛹兩頭光帶黃色涇帥段祐宅失銀器十餘集奴婢環庭灸之蟲慄動有一女奴臉脣瞤動乃竊器者

返魂香東方朔曰月氏國使者獻香曰東風入律百旬不休青雲干呂連月不散意中國將有好道之君故搜奇蘊異而貢神香乘沈牛以濟弱淵策驥足以渡流沙今十三年矣香能起天殘之死疾下生之神藥也疾疫夭死者將能起之以薰牙及聞氣者卽活明日失使者所在後元元年長安疫死者大半帝分香燒之死未三日皆活芳氣三月不歇餘香一旦失亡

涼土異物志葱嶺水分流東西西入大海東爲河源禹所言崑崙蓋本河所出也潛發於蒲昌洛書所紀出於重野經積石爲中國河也張騫但能至大宛見河水初未達其潛發處桑欽水

經云崑崙在河水西北去嵩高五萬里其高萬一千里酈道元云崑崙之山三級下曰樊桐一曰板松二曰玄圃一名閼風上曰層城一名天庭是謂大帝之居十三州志云山去北海岸十三萬里有弱水周帀東南接積石高誘曰河出崑山伏流地中萬三千里禹導而通云以出積石山海經乃云自崑崙至積石一千七百四十里又曰西海之南流沙之濱赤水之後黑水之前有大山曰崑崙又曰鍾山西六百里有崑崙周穆王崑崙瑤池去周之漻澗特萬有一千一百里西王母告穆王云去咸陽乃三十六萬里東方朔十洲記方丈在東海之中央羣仙所治爲崑崙山有三角曰閼風曰玄圃曰崑崙宮張華所敘崑崙銅柱爲天柱蓋本方朔神異經也釋氏西域志阿耨達山上有大淵水宮殿樓觀甚大卽崑崙山穆天子所至卽阿耨達宮也西

爲新頭河爲天竺諸國皆渡葱嶺郭璞曰似別有小崑崙
李畋虞部該聞錄所取神仙七人爾朱先生朱真人桃稚神和
子屈突無爲海蟾子劉昭遠榮隱先生火井縣許山人漢杜光
庭

龍腦香段成式云出波律國樹高八九丈可六七尺圍乾脂爲
香清脂爲膏子主內外障眼又有蒼龍腦不可點眼經火爲熟
龍腦

香譜云麝以一子真香糅作三四子刮取血膜雜以餘糝皮毛
不辨也黎香有二色蕃香蠻香又雜以黎人撰作官市動至數
千計何以塞科取之責所謂真有三說鹿羣行山中自然有麝
氣不見其形爲真香入春以腳踢入水泥中藏之不使人見爲
真香殺之取其臍一鹿一臍爲真香此余所目擊也

仁善盛明曰舜殘民多譽曰桀殘義損善曰紂慈惠愛親曰孝
愛民好與曰惠聖善周文曰宣聲聞宣遠曰昭克定禍亂曰武
聰明睿智曰獻溫柔性善曰懿布德執義曰穆仁義悅民曰元
安綱治紀曰平亂而不損曰靈保民者艾曰明辟土有德曰襄
貞心大度曰匡太慮慈民曰定旣過能正曰恭不匡其國曰聲
一德不解曰簡夙興夜寐曰敬清白自守曰貞柔德好聚曰靖
安樂治民曰康小民畏忌曰僖中身早折曰悼慈仁和民曰頃
好勇致力曰莊恭仁短折曰哀佐國逢難曰愍名實過爽曰繆
壅遏不通曰幽暴虐無親曰厲致志士圖曰景辟土兼國曰桓
經緯天地曰文執義揚善曰懷短折不成曰殤去禮遠眾曰煬
忌政外交曰攜治典不敷曰震

太學同官有曾官廣中者云沈香雜木也朽蠹浸沙水歲久得

之如儋崖海道居民橋梁皆香材如海桂橘柚之木沈于水多年得之爲沈水香本草謂爲似橘是已然生採之卽不香也海藥本草云降真香主天行時氣燒之或引鶴降

雀頭香卽香附子

倉頡解詁云芸蒿似邪蒿可食魚豢典略云芸香辟紙魚蠹故藏書臺稱芸臺

南唐女冠耿先生鳥爪玉貌獲寵於元宗將誕之夕震雷繞室大雨河傾半夜雷止耿身不復孕大食國進龍腦油上所祕惜先生見之曰此非佳者當爲大家致之乃縫夾絹囊貯白龍腦一斤垂於棟上以胡餅盛之有頃如注上駭嘆不已命酒汎之味逾於大食國進者又於元宗前搗雪爲銀鋌投紅鑪淬之成中金指痕猶在又取宮妓箕中糞壤沙爲銀開寶末內庫尙有

先生糞銀炒小麥於銀釜成眞珠

禹治水土至北海之北有國曰終北國之中有山山名壺領狀若甌甄頂有口狀若負環名曰滋穴有水湧出名曰神瀆臭過椒蘭味逾醪醴一源分爲四埒注于山下民飲于神瀆浴于神瀆此列子寓言也

泥壁未乾揮涕其上陰雨中化爲蟲狀如蚓

東方介氏之國其國人數數解六畜之語者蓋偏知之所得太古神聖之人備知萬物情態悉解異類音聲會而訓之言血氣不相殊也

條支國臨西海出獅子大雀郭義恭廣志曰大雀頸及身膺蹄都似橐駝舉頭高八九尺張翅丈餘食大麥其卵如鷄今之駝鳥也漢元帝時有大鳥如馬駒時人謂之爰居

卷三
五
環王國野象一牡管三十餘牝牝者牙纔二尺迭供牡者水草
臥則環守牡象死共埋之號吼其處乃散

鼈爲臚數食可長鬚

鯢魚心肝及頭毒如野葛

蝟蚌大者力能與虎鬪取之不戒螫能剪殺人

蟹皮殼甚銳然性畏蚊蚊小螫之輒斃燕山錄曰煮羊以鼈煮
蟹以蚊物有相感鵠鵠飲水數升而不足鱸鮪入口若露而死
猿有手可以捕鼠而制於鼠鹿有角可以觸犬而制於犬

續博物志卷三終

續博物志卷四

燧人四佐明由曉升級也政必育受稅役也賦成博受古諸也侯隕

受延嬉也錄

伏羲六佐金提主化俗也民鳥明主建福也利視默主災惡也害紀通

爲中職也內仲起爲海陸也土陽侯爲江海也水

黃帝七輔風后受金法天老受天籙五聖受道級知命受糾俗

窺紀受變復地典受州絡力墨受準斥力墨一作力收陶淵明云事見

論語摘輔象

孔長彥孔季彥兄弟聚徒數百故時人爲之語曰魯國孔氏好

讀經兄弟講誦皆可聽學士來者有聲名不過孔氏那得成

孔子生鯉字伯魚鯉生伋字子思伋生白字子上白生求字子

家求生箕字子京箕生穿字子高穿生子順相魏自叔梁紇至

子順九世魏城大梁

毛蟲之精曰麟羽蟲之精曰鳳介蟲之精曰龜鱗蟲之精曰龍裸蟲之精曰聖人

劉向校勘以來子歆爲七略大凡萬三千二百六十九卷王莽焚燒之後王允收而西者僅七十餘乘道遠復棄其半荀勗分經史子集爲四部大凡九千九百四十五卷西晉李兌以勗舊部校之在者三千一十四卷宋謝靈運造四部目凡四千五百八十二卷王儉造目錄萬五千七十四卷齊王亮造書目萬八千一十卷梁任昉文德殿所藏二萬三千一百六卷元帝克平侯景收文德殿書歸江陵凡十餘萬卷周師焚之宋武所收四千卷後周書目八千增至萬卷周武平齊僅至五千卷唐滅隋魏鄭公盡收圖書載以船經砥柱沒十之七八大凡八萬六千

九百六十六卷見在三萬六千七百八卷開元中四部目錄凡五萬一千八百五十二卷

自秦同書文丞相斯作倉頡篇中車府令高作爰歷篇太史敬作博學篇文園令相如作凡將篇黃門令游作急就篇皆書文之林苑欲識字者不可不知惜哉凡將已上不可復見急就章存焉西京文氣亦可見矣顏籀注此書嘗得皇象鍾繇衛夫人王會稽等篇世所傳唯張芝索靖二家爲真章草書芝有鳳爵鴻鵠等數行靖所書乃三之二自毋縛而下闕七百五十字前輩云於字必字無草書

宋袁淑作廬山公九錫文荷橐致餐爾之功音隨時興爾之智用不應時爾之鳴長頰廣額修尾後垂爾之能是用遣中大夫閭丘廬加爾使御大鴻臚班腳大將軍以揚州之廬江吉之廬

陵吳之桐廬封爾爲廬山公大蘭王九錫文太亥十年乙亥朔十三日丁亥燕伯使者豪狶冊命大蘭王曰咨資參養於人主雖無爵而有秩君之純封國豕氏君之美白躋彰於周詩涉波應乎隆象君之德長驅直突陣無全鋒君之勇

宣父因禱尼山得名丘字仲尼子名鯉字伯魚史鮪亦字子魚冉耕字伯牛如鬪穀於菟之類黑臀杵臼之類甚多

宋齊丘乃字超回不自量如此孟軻莊周其字不傳或云軻字子輿周字子休皆後人以意取之耳

東漢無復名或云王莽之禁沿襲所致

不可爲叵如是爲爾而已爲耳之乎爲諸西域二合之音切字之原也

絳州碧落觀天尊像高丈餘唐龍朔中刺史李謐爲母氏太妃

追薦所造上有篆文老黃冠云李使君高宗之子有二道士求篆此文閉戶篆畢化爲二白鴿飛去餘一及字欠一畫李陽冰於此學篆凡十二年終不得其妙

明皇獲二十七仙玉像於寧州羅川縣金華洞奇偉異狀各各不同內有心星一坐甚美手板復有明致御名其地屬互可思莊其人已百歲後置真寧觀改羅川爲真寧縣今有玉像圖傳於世

上元末肅宗獲十三寶於楚州改元寶應

天寶中大宛進汗血馬六匹一曰紅叱撥二曰紫叱撥三曰青叱撥四曰黃叱撥五曰丁香叱撥六曰桃花叱撥上乃製名曰紅輦曰紫玉輦曰平山輦曰凌雲輦曰飛香輦曰百花輦後幸蜀以平山凌雲爲讖西京雜記漢文自代還有良馬九匹皆天

下駿也一浮雲二赤電三絕羣四逸驃五紫鸞六綠驪七龍子
八麟駒九絕塵號九逸

易林曰巽爲雞雞鳴節時家樂無憂

皇覽曰蚩尤冢在東郡壽張縣鬲鄉城中高七尺常十月祠之
有赤氣出如絳名爲蚩尤旗

穀城西流泉西北入清水域西北三里有項羽冢石碣猶存題
云項王之墓皇覽謂去縣十五里謬也彭城穀陽城西南又有
項羽冢水經謂爲非魯爲楚守漢王以羽首示魯乃降遂以魯
公禮葬羽於穀城以穀陽城穀城二冢得非身首異處乎皇覽
曰山陽鉅澤縣有肩髀冢黃帝殺蚩尤身首異處故別葬亦二
冢也

濟水東北灤水出焉灤水出歷縣舊水涌若輪齊侯會於灤是

也有舜妃廟對山有舜祠舜井舜耕歷山亦云在此蒲坂縣西有歷觀舜所耕歷山有舜井瀉汭二水山上有舜廟周處風土記曰舜葬上虞耕處卽始寧剡二縣山下多柞木吳越之間名柞爲櫪故曰歷山二說一以灤爲歷一以櫪爲歷未知孰是皆酈道元說

牧靡縣因草得名生牧靡可以解毒鳥多誤食鳥喙口中毒必急飛往牧靡山啄牧靡以解毒

馬出越睽之西若羔紐莎縻之粉米飲之七歲可御日馳數百里

東觀漢記王阜爲益州太守神馬四出滇河中魏末有神馬夜過官牧迹大如牛入河水中

眞誥金陵古名之爲伏龍之地句曲山秦時爲句金之壇以積

金山得名山生黃金漢靈帝詔採句曲之金以充武庫孫權遣宿衛人採金屯伏龍之地因改名金陵陶洪景云大茅山尙有數坑名金井山之近東諸處碎石往往皆有金砂真誥又云水色白卽不學道飲此水亦令人壽亦金津液之所溉耶

岡山有穴通大句曲山有石腦在方山下石腦故如石但小班色而軟形狀圓小如層色似鐘乳李整昔有風疾先多房事服此乃愈

豫章城南門曰松楊門門內有樟高七丈五尺大二十五圍垂陰數畝漢官儀曰豫章郡樹生庭中因以爲名

劉歆云湖漢等九水入彭蠡因言九江

沫水出廣柔徼外有石紐鄉禹所至也

沫水自濛山至南安溷崖水脈漂疾歷代爲患蜀守李冰發卒

鑿平溷崖河神最怒冰操刀入水與神鬪遂平溷崖

續博物志卷四終

續博物志卷五

女媧之功烈上際九天下契黃墟名聲被後世光輝重萬物乘雷車服應龍驂青虬席蘿圖震黃璐援絕瑞前白螭後奔虵項浚始學篇曰天地有天皇十三頭洞冥記曰一姓十三人徐整歷紀曰歲紀攝提元氣肇有神靈一人有十三頭始學篇曰人皇九頭兄弟九人九州各居其一

夷者觝也其類九畎夷千夷方夷黃夷白夷赤夷玄夷風夷蠻者慢也其類八天竺咳首僬僬跂踵穿胸儋耳狗軹旁脊戎者兇也其類六僥夷戎夷老白耆羌鼻息天剛狄者辟也其類五月氏獬狔匈奴單于白屋

蜀蠻邛部川都王蒙備死氣未絕其妻子以錦數疋相續繫死者曳之於地置十數里外高山上令氣絕乃復以錦被裹而埋

卷五
之會其族哭之名作鬼親守近州蠻人說其事

倭辰余國或橫書或左書或結繩或鏤木唯高麗摹寫穎法取正中華

以清水漱口飲酒至斗不亂或曰酒毒自齒入也

南人好飲茶孫皓以茶與韋昭代酒謝安詣陸納設茶果而已
北人初不識開元中太山靈巖寺有降魔師教禪者以不寐人多作茶飲因以成俗

楚人陸鴻漸爲茶論并煎炙之法造茶具二十四事以都統籠貯之常伯熊者因廣鴻漸之法伯熊飲茶過度遂患風氣或云北人未有茶多黃病後飲病多腰疾偏死

唐則天於東都造明堂高三百尺九州鼎置明堂之下當中豫州鼎高一丈八尺受一千八百石餘各依方面高一丈四尺受

一千二百石都用銅五十六萬七百一十二斤

禹治洪水觀於河見白面長人魚身出曰吾河精也授禹河圖而返於淵又曰堯修河洛有五老相謂河圖將來告帝以期知我者重瞳也五老乃翻爲流星而升於昴

山東風俗遇正月取五姓女年十餘歲共臥一榻覆之以衾以箕扇之良久如夢寐或欲刺文繡事筆硯理管絃俄頃乃寤謂之扇天卜以乞巧

衡山五嶽之南嶽也黃帝以潛霍爲山之副爾雅云霍山爲南嶽至漢武以衡山道遠徙祭於廬江潛山或曰衡山卽霍山山海經衡山卽岫嶠山常山者陰終陽始其道長久故北山曰常山亦曰恆山其山五穀四種五穫

一勝梁米以純苦酒一斗漬之三日出百蒸百暴遠行一殮十

日不饑重飧四百九十日不饑又方米一斗赤石脂三斤水漬之二三日搗爲丸如李大可辟穀

靈寶五符經用白鮮米九蒸九暴

庚桑名楚史記作亢桑

夏棘字子棘爲湯大夫列子作夏革

月令曰椒是玉衡星精服之身輕能老柏是仙藥又云進酒次第當從小起以年少者起先

燃草爆竹起於庭燎

正月望祭門先以楊枝插門隨楊枝所指以酒脯飲食及豆粥插筯祭之

酒杯藤出西域藤大如臂葉似葛花實如梧桐花堅可以酌酒有文章映徹可愛實大如指如豆寇香美銷酒來至藤下摘花

酌酒仍以其實醒酒國人寶之不傳中土張騫使大宛得之出
張騫出關志

菊花舒時採莖葉雜黍米釀之至來年九月九日始熟謂之菊
花酒

孟詵云葡萄不問土地但收之釀酒皆得美好

昔有於王敦城下得一銅鉦中間鑄一物如羊頭其身如篆文
乃飛廉也

倉頡本鳥迹爲字取其孳乳相生故有六義秦用篆文燒書古
文遂絕或曰大篆出周宣王史籀小篆出秦李斯及胡毋敬又
曰古隸之書起於秦省篆爲隸以便文行劇務以明隸者篆之
捷也或曰程邈於雲陽增損或云臨淄人發古塚得桐棺前和
外隱爲隸字言齊太公六世孫胡公之棺唯三字是古隸證知

隸自古非始於秦或曰秦人王次仲變倉頡舊文爲今隸文始皇奇而召之三徵不至秦檻車徵之次仲化爲大鳥飛去落三翻於山山有大翻小翻之名

彭城縣古彭祖之國也世本曰陸終之子其三曰錢是爲彭祖下曰彭祖塚彭祖長年八百綿壽永世而亦有塚者蓋亦元極之化

蒲坂西舜所都有姓劉名墮採捫河流醢成芳酌食同枯枝之年排於桑落之辰故酒得其名方土之貢最爲佳酌每云索郎有顧思同旅語索郎反語爲桑落也

海中有度朔山上有桃木蟠屈三千里枝東北鬼門萬鬼所出人也茶與鬱壘居其門執葦索以食鬼故十有二月歲竟臘之夜遂以茶壘并挂葦索于門

王充云會稽本山名夏禹巡狩會計于此遂以名郡或曰此非五嶽禹時吳裸斷髮文身無會計事

董生春秋繁露曰春早以甲乙日爲蒼龍長一丈八尺居中央爲小龍七各長四尺於東方皆東向其間相去八尺小童八人齋三日服青衣而舞之下三時準此皆燔雄雞燒豕猪尾於里北門及市中以祈焉

蜥蜴求雨法以土實巨甕作木蜥蜴小童操青竹衣青衣以舞歌曰蜥蜴蜥蜴興雲吐霧雨若滂沱放汝歸去

交州安陽王有神人名臯通爲安陽王治弩一張一發殺三百人

今之所謂石九十二斤法爲準漢秤三百四十一斤也今之蹶弩九石古之二十五石比魏武卒二人之力挽弓三石古之三

十四鈞比顏高之弓當五人有餘

卷三

四

續博物志卷五終

續博物志卷六

少典產黃帝黃帝產元囂元囂產嶠極嶠極產高辛是爲帝嚳
帝嚳產放勳是爲帝堯

黃帝產昌意昌意產高陽是爲顓帝

昌意玄囂弟黃帝次子也

顓帝產窮蟬

窮蟬產敬康敬康產勾芒勾芒產嶠牛嶠牛產瞽叟瞽叟產重
華是爲帝舜及象

顓帝產鯀鯀產文命是爲禹

唐六典三年一享帝嚳氏於頓丘享唐堯於平陽稷契配享虞
舜於河東咎繇配享夏禹於安邑伯益配享商湯於偃師伊尹
配享周文王於鄴太公配享武王於鎬周公配享漢高祖於長
陵蕭何配享皆以仲春之月

蜀州青城丈人山每歲春秋一時享以蔬饌以縣令行

車頻秦書曰苻堅高陸縣民穿井得龜大二尺六寸背文負八卦古字堅以石爲池養之十六年而死取其骨以問吉凶名爲客龜言我將歸江南不遇死于秦曾于夢中自解曰龜三萬六千歲而終符秦亡之證

秦龜卽山中龜不入水水中神龜長一尺二者佳龜見蛇則呷而食之

李德曰楊雄蜀王本紀言張儀築城依龜行迹築之到此聞龜殼酒庫官宇文遇曰此嘗爲主庫小吏見龜殼長六尺元和初高崇文截以爲帶胯

野王縣東南有孔子廟有碑魏太和元年孔靈度以舊宇毀址求脩復野王令范眾愛河內太守元眞刺史高允表聞立碑於廟治中劉明別駕呂次文主簿向班虎苟靈龜以宣尼大聖非

碑頌所稱宜立記焉仲尼聞殺鳴犢旋車而反晉思之爲立廟碑云孔氏官於洛陽下追思聖祖故立廟亦猶劉累遷魯立堯祠於山矣

鷺鳥雄小雌大庶鳥雄大雌小

鷺鷥能勅水故宿水而物不害鶴能巫步禁蛇啄木遇蠹以背畫字成符而蠹自出鵲有隱巢木鷺鳥不能見鷺銜避戊巳日則巢固而不傾鶴有長水石故能於巢中養魚而水不涸鷺惡艾雀欲奪之則銜其中

鷺有長翰毛江東人取以爲接離名之曰白鷺縗

虎鷹能飛捕虎豹身大如牛翼廣二丈

護草一名鹿葱花名宜男風土記云姪婦佩其花生男也

李衛公云金錢花損眼

牡丹初不載文字惟以藥見本草唐則天以後落花始盛沈宋元白亦不及也劉夢得有咏魚朝恩宅牡丹但云一叢千朶謝靈運言永嘉竹間多牡丹今越花不及落花遠甚或曰靈運之所謂牡丹今之芍藥特盛於吳越

杞菊山芋牛蒡道家以爲嘉蔬江淮百合根大而味甘南地微苦其次決明合歡槐芽亦可食孫思邈以合歡爲萱草嵇叔夜云合歡蠲忿萱草忘憂兩物也

山肖一名山綵神異經作獯永嘉郡記作魅一名山駱一名蛟一名灌肉一名熱肉一名暉一名飛龍如鳩青色亦曰治鳥巢大如五斗器飾以土堊赤白相間狀如射侯犯者役虎害人燒人廬舍昔值洪水食都樹皮餓死化爲鳥姚王汪三姓其姓也俗諱五月上屋言五月人蛻上屋見影魂當去

二廣有草名胡蔓以急水吞之卽死慢水卽緩死取毒蛇殺之以此草覆之灑水菌生其上末爲毒藥殺人

北人淫南婦辭歸以毒置食約以年月復還解以他藥不爾毒發死矣謂之定年藥南游者宜誌之

宋劉亮合仙丹須白蟾蜍白蝙蝠得而服之立死唐人陳子真得蝙蝠大如雅食之一夕大瀉而死

小蜘蛛長腳者一名蠭蛸一名長崎俗名喜子陸璣疏詩名長腳荊州河內人謂之喜母

段成式云主夜神咒可辟惡夢咒曰婆珊婆演帝

清秦小字二十三蓋正月二十三日生也以是日爲千春節

臣奏對但云兩旬三日或數物則云二十二更過二十四不敢斥尊也

先賢傳魯百恭土名曰汜行年七十其恭益甚冬日行陰夏日行陽一食之間三起

秦穆公時有人掘地得物若羊將獻之道逢二童子謂曰此名爲蝮常在地中食死人腦若欲殺之以柏東南枝捶其首由是墓皆植柏又曰柏爲鬼廷

漢孝和時南海獻龍眼荔枝十里一置五里一候交州記曰龍眼高五六丈似荔枝而圓小謝承書曰唐羌字伯游上書諫以龍眼荔枝及生鮮獻之驛馬晝夜傳送至有死者二物升殿未必延年益壽帝從之

魏初傳古文出邯鄲滄石經古文轉失滄法石長八尺廣四尺碑石四十八枚廣三十丈魏文帝刊典論六碑附於其次陸機太學贊別一碑在講堂下載蔡邕韓說高堂谿等名太學弟子

贊復一碑在外門中又一碑漢順帝陽嘉八年立云建武二十七年造太學永建六年九月詔書脩太學工徒十一萬二千人

陽嘉九年八月作畢有晉辟雍行禮碑是太始二年立

子曰乾之動直靜專坤動闢靜翕其根也天根每日兩度蹴入尾閭巨壑則海沸出潮

世傳費長房得符於壺公以是制服百鬼其後鬼竊其符因以殺長房

道士屍解謂之身輕太陰

李泌在衡山事明瓚禪師瓚云欲學者先將碑硯碎卻明瓚北宇大照之門人性懶羣僧令看鹽雨至流於池羣僧毆之不怒冬月臥於竈前不起以粥灑其頭因就頭取喫號懶瓚作明心論

後漢崔篆著易林六十四篇篆駟之祖父或曰卦林或曰象林
白馬猶緇布名實而已

續博物志卷六終

續博物志卷七

老子谷神不死至用之不勤此章全是黃帝之言今在五千文內則老氏所著書恐非專已出

正月不食生葱三月勿食小蒜四月勿食大蒜五月勿食薤六月七月勿食茱萸成血痢八九月勿食薑并肝心肺十月勿食椒十一月十二月勿食戴甲之物并脾胃

眼者身之鏡耳者體之牖視多則鏡昏聽眾則牖閉面者神之庭髮者腦之華心悲則面焦腦減則髮素精者體之神明者身之寶勞多則精散營竟則明消

人死必視其形如生人足不青皮不皺目光不毀頭髮盡脫而失形骨者皆尸解也武德三年晉州人吉善行於羊角山見白衣父老呼善行曰爲吾語唐天子吾爲老君卽汝祖也高祖因

立廟高宗追尊之元皇帝明皇親注老子令學者習之兩京及諸州各置之元皇帝廟京師號之元宮諸州號紫極宮尋改西京爲太清宮東京爲太微宮皆置學生

蒿菜出周國有毒百蟲不敢近蛇虺過其下誤觸之則目瞑不見物有中其毒者唯生薑汁解之

食黃鰓魚後飲荊芥湯卽死

草木之生動搖者生而不暢人之導引動搖引體者何故壽而不死

堯若腊舜若腊桀紂之君垂腴尺餘

王充曰雷公有神雷聲有器安得謂之神正月陽動故始雷五月陽盛故雷迅秋冬陽衰故雷潛太陽用事陰氣乘之陰陽分爭則相激射爲毒中人則死中木則折人以震死試以斗水沃

冶鑄之火火氣激烈則爲雷聲或曰雷火之及金石焦鎔而漆器不壞何也道家以雷燒石投井中石焦水寒激聲大鳴

顏淵與孔子俱上泰山東南望吳昌門外孔子見白馬引顏淵指之若見吳昌門乎顏淵曰見之有繫練之狀孔子撫其目而止之顏淵髮白齒落遂以病死蓋精力不及聖人而強役之也椒似茱萸而小赤色

橘似梨而酢澀鹿食椒橘葉其肉自然作椒橘香江東呼蘘爲藤似葛而麓大梗似豫章杼斗爲櫟或言阜斗椹實似柰柚似橙而酢

淮南子曰很者類知而非知也愚者類君子而非君子也慝者類勇而非勇也使人相去也若玉之與石也葵之於菟也則論人易矣夫亂人者若芎窮之與藁本蛇牀之與薜蘿

莫莢一名歷莢聖王以是占日月之數

朱草狀如小桑栽長三四尺枝葉皆丹汁如血朔望生落如莫莢周而復始可以染絳成黼黻之章金銀投其汁可使成圓泥成水爲金漿以投之爲玉醴飲之令人長生出抱朴子

騾國諸蠻並不養蠶收娑羅木子破其殼中如柳絮細織爲幅服之謂之娑羅籠段

蠻法煮鹽成團爲顆質則以顆計之

茶出銀生諸山採無時雜椒薑烹而飲之

生金出長傍諸山取法以春或冬先於山腹掘坑方夏水潦蕩沙泥土注之坑秋始披而揀之有得片塊大者重一斤或二斤小者不下三四兩先納官十分之八餘許歸私仍累勞効免征賦麩金出麗水河睽川有罪送淘金所最爲重役會同川銀山

出銀礦私置冶官收十之三若睽川有錫山出錫

蘇耽郴縣人嘗與眾兒共牧牛更直爲師錄每至耽直牛不逐自還旣而辭毋仙去又說年疫穿一井飲之可得無恙

道士譚紫霄有觀燈之術說人禍福必中

郭頒世語云魏黃初盜發吳芮冢見芮屍容貌衣服竝如生吳平發冢人於壽春見南蠻校尉吳綱曰君形貌可類長沙王吳芮乎但君微短耳綱矍然曰是先祖也自芮卒至冢發四百年至綱又四十年矣

丹水有石穴蝙蝠大者多倒懸百歲者倒懸得而服使人神仙陶隱居云學道之士居山宜養白犬白雞可以辟邪

蘇枋木自然蟲糞爲紫粉

秦二十一年鑄金狄十二釋氏之源本霍去病討休屠王獲其

祭天金人武帝以爲神列於甘泉宮魏黃初元年徙長安銅狄重不可致或言金狄泣因留霸城南人有見薊子訓與父老共摩銅狄曰正見鑄此時計爾曰已近五百年矣董卓毀其九爲錢苻堅毀其二爲錢其一百姓推置陝北河中或云翁仲頭髻常出晉軍至髻不復出

陳正敏所取者陳搏李瀆林逋魏野皆遯世之士希夷先生陳搏服氣辟穀二十餘年或寢百餘日不起太平興國中召入復放還山一旦自作表云臣搏大數有終聖朝難戀已於今月二十日化形於蓮花峰如期而卒七日支體猶溫五色雲蔽洞口彌月不散已百餘歲矣

劉向列仙傳葛洪神仙傳沈玠續仙傳曾慥集仙傳以異代事著於本朝者自爾朱洞呂崑陳搏賀元曾被祖宗眷異者名臣

如歐陽脩劉九石延年皆在賀元仕石晉爲水部員外郎章聖東封謁道左天聖初使弟子喻澄詣闕獻浮屠老子像直數十萬毛女在華山山客獵師世世見之體生毛自言秦始皇宮人陳搏在華山或謗以與毛女往來

孔安國撰孔子弟子七十二人劉向傳列仙亦七十二人皇甫士安撰高士亦七十二人陳長文撰耆舊亦七十二人

李泌絕粒五六載身輕能行於屏風上引指使氣可以吹燭至滅導引骨珊然有聲號鑠子骨

鬻子名熊楚人爲文王師年九十見文王曰使臣捕獸逐麋已老矣使臣坐策國事尙少也

按葛仙公云素書乃河上公以授漢文帝也黃石公所授張子房多云陰符非也一云三略乃子房所著非所授之書或曰河

上公授漢文帝不應於子房墓中得之黃石公丹書身之八殺貪殘姦酗狡佞許愎命之四業背惠恃已狎不肖妬賢能昔有一人好道而不知求道之方唯朝夕拜跪向一枯樹輒云乞長生如此二十八年不倦枯木一旦忽生華華又有汁甜如蜜有人教令食之遂取此華及汁並食之食訖卽仙劉少翁曾數入太華山禮拜向山如此二十年遂忽一旦得見兩嶽丈人授其仙道

一人數旦旦詣河邊拜河水如此十年河侯河伯遂與相見與其白璧十雙教授水行不溺法

薏苡一名薏珠收子蒸令氣餽暴乾按取之作飯麵主不飢作乾薑法水淹三日畢置流水中六日更去炭然後曝乾入甕瓶謂之釀也

淫羊藿一名仙靈脾淫羊一日百遍食藿所致

新生艾作乾菜妙作餛飩吞三五枚以飯壓之良療一切鬼氣
蘇合香本草云生中臺川陶云是師子尿又云是諸香汁煎之
非一物從西域來者如紫檀重如石蓼莪是山葡萄

江東人通名楊柳楊葉短柳葉長

高座道人不肯作漢語或問此意簡文曰此簡應對之煩和尚
胡名尸梨密宋云高座西域人傳三國王子以讓弟遂爲沙門
永嘉中到中國

順帝時琅琊宮崇上其師于吉於曲陽泉水上得神書百七十
卷號太平清領書其言以陰陽五行爲家而多巫覡雜語後張
角頗有其書按江表傳道士于吉東來吳會立精舍燒香讀書
孫策斬之曰昔南陽張津爲交州刺史常著絳帕頭鼓琴焚香

讀邪俗道書爲蠻夷所殺此甚無益

真誥云吞琅玕之華而更營丘墓者羨門子高丘子洪崖先生
羨門子墓在幽州漁陽高丘子墓在中山洪崖先生墓在武威
此三郡縣人竝云上古死人空塚

王子喬墓在金陵戰國時有發墓者唯見一劍

漢地理志大江九江中一源而三目

楊雄益州箴巖巖岷山古曰梁州魯城北有孔子學堂蜀有文
翁講堂北海有鄭司農儒林講堂宅亦曰第言有甲乙之次第
也漢書成帝王甲觀中畫堂魏有茅堂

續博物志卷七終

續博物志卷八

後漢襄楷延熹中上疏云宮中立黃老浮屠祠陛下嗜慾不去豈獲其祚或云老子入夷狄爲浮屠浮屠不三宿桑下不欲久生恩愛精之至也天神遺以好女浮屠曰此但革囊盛血遂不盼之

漢帝問陳蕃徐稚袁宏孰爲後先蕃答袁生公族不鏤自雕至於徐稚傑出薄城故宜爲先

伏生爲秦博士文帝撰五經尙書太傅使掌故歐陽生等受尙書於伏生潞水有徵君伏生墓

晉書地道志曰遼西人見遼水上有浮棺欲破之語曰我孤竹君也汝破我何爲因爲立祠或曰漢靈帝時遼西太守廉翻因

夢得之

此與前志小異

沈彬保大中以尚書致仕居江西高安手植一木於平野戒諸子曰必葬我此地子孫伐木掘土深丈餘得一石椁上刊八字云開成二年壽椿一所卽葬之

墨子惡樂故朝歌回車論語考讖曰邑名朝歌顏子不舍七十弟子掩目宰予獨顧由廕墮車宋均曰子路患宰予顧視凶地故以足廕之

齊時有發古塚得銘云青州世子東海女郎河東賈昊以爲司馬越女嫁爲荀晞子婦檢之果然

東都殖業坊十字街有王戎墓隋代釀家穿其傍作窖得銘曰晉司徒尚書令安豐侯王君銘

廣川王去疾發魏王子且渠冢甚淺狹無棺柩有石牀牀下悉是雲母牀上兩尸一男一女皆年二十許東首裸臥顏色如生

人髻髮齒牙亦如生人王畏懼不敢近

晉靈王冢屍亦不壞唯玉蟾蜍一枚

幽王冢甚高壯雲母深尺餘百餘尸相枕藉皆不朽唯一男子餘皆女子

樂書冢有一白狐王擊之傷其足王尋病足死

蕭穎士與行侶共濟瓜州舟中二少年相顧曰甚有肖鄱陽忠烈王穎士是鄱陽曾孫卽自款陳二子曰吾識而祖久矣遽負擔而去穎士北歸盱眙吏獲發冢盜五六人穎士認江中二少年亦在內穎士以前說詢之曰我嘗開鄱陽王冢當門貴人顏色如生與穎士相類此與吳綱似吳芮事頗同芮事出水經穎士事出薛用弱集異記

九真山多大蛇名曰髯蛇長十丈圍七八尺吞鹿角骨鑽皮出

夷以大竹籤殺而食之楊氏南裔異物志曰髯惟大蛇旣洪且長采色駮犖其文錦章食犬吞鹿腴成養創賓享嘉燕是豆是觴

武強縣有行于途得一小蛇養之名擔生長而噬人里人遂捕繫獄擔生負而奔邑淪爲湖縣官吏爲魚矣

漢光武二年鮮于冀爲清河太守作公廨未就而亡後守趙高計工用二百萬黃秉劉適言四百萬冀乃鬼見白日道從人府與高及秉等對共計校定爲適秉所割匿冀乃書表自理言高貴不尙節隴畝之夫而箕踞遺類媚世求顯偷竊銀艾鄙辱天官臣不勝鬼言去三十里車馬皆滅不見秉等伏地物故高以狀聞詔差代以旌幽中之訟

老人晨渡朝歌水而怯紂曰老者髓不實故晨寒因斲脛以視

髓

紂有新聲靡樂作邑朝歌史記曰朝歌之音歌不時也

虞虢之間傳說隱室傳巖俗名之爲聖人窟

劉向敘晏子春秋稱古冶子曰吾嘗濟於河鼃銜左驂以入砥柱之流吾從而殺之

孔子臨狄水而歌曰狄水衍兮風揚波船楫顛倒更相加

汲縣所汲郡有石夾水爲磻溪太公釣處有太公泉太公廟

牧野竹書作毋野有比干墓前有石銘題隸云商大夫比干之墓舊記唯此漢高宗孝文各爲立碑

顏含字洪都兄畿得疾死於醫家人迎喪引喪者顛仆曰我壽命未死但服藥太多傷五藏耳及還婦夢之曰吾當復生急開梓以手刮棺指爪盡傷氣息甚微飲食所須託之以夢含侍養

足不出戶者十三年幾竟不起

二廣深溪石壁上有鬼影如淡墨畫船人行以爲其祖考祭之不敢慢俗好於門畫虎頭書聾字謂陰司刀鬼名讀漢舊史儼逐疫鬼又立桃人葦索滄耳虎等聾字蓋滄耳也

俗傳鍾馗起於唐明皇之夢非也北史堯暄本名鍾葵字辟邪于勁字鍾葵費宗慤妹名鍾葵非特明皇時但葵馗二字異耳又曰終葵菜名

閩中多木綿植之數千株採其花紡爲布名吉貝南史言林邑等國出古貝木以古爲吉訛也

樅松葉柏身檜柏葉松身

黃公好謙女有國色而謙其美以爲醜也女至難嫁有鰥夫冒娶之乃國色果信黃公之謙

魏田夫耕於埜而得玉弗識也隣人陰欲得之給曰怪石也田父置玉於室其光燭夜果以爲怪棄之於埜隣人從而盜之以獻魏王玉工望而拜曰此無價之寶

陶隱居書自奇世傳畫板帖及焦山下瘞鶴銘皆其遺迹

王會稽七子凝操徽渙獻五人書迹傳世惟玄肅二人未見而五子書各不同蓋善學父書者

郝氏夜祠佛鬼車乘燭光而下翼廣丈餘九首互相低昂其家呼犬持杖逐之墜一羽長三尺許廣八九寸色類鵝鴈

江浙間有鳥名飛生狐首肉翅四足如獸飛而生子卽隨母後人有難產以其爪安胸腹間立驗亦有得其皮者

有異鳥鳴如嬰兒巢於木探得其雛大如鵝青首白面觜爪類鷹鶴或曰此鵬也

高麗人參贊正極五葉背陽向陰欲來求我椶樹相尋椶木葉似桐甚大陰廣參多生其陰

王孫一名黃孫一名黃昏孫思邈有黃昏散注云黃昏木或曰合歡合昏夜合花陳無已云探囊一試黃昏湯草部木部黃昏爲二物郭璞曰守宮槐晝曰聶合而夜舒布也江東有木與此相反俗因名合昏古今注云合歡似梧桐枝葉互相結風來解使人不忍嵇康種之於舍前

續博物志卷九

南昌縣出然石異物志云色黃而理疏以水灌之便熱以鼎炊物可熟置之則冷如此無窮元康中雷孔章入洛賁以示張公張公曰此謂然石

晉書曰漢末博士燉煌侯瑾善內學弱水出流沙流沙與水流行也在西海郡北山有赤石白色以兩石相打則水潤打之不已則潤盡火出山石皆然炎起數丈不滅有大黑風自流沙出奄之乃滅其石如初不敢輕近耳

火井以草爨之則烟騰火發湯井以草內之則露凝

鐸銷狀如刀戈殘刃有孔旁達出麗水飾以金所指無不洞夷人尤寶月以血祭之俗謂天降非人鑄鬱刃鑄以毒藥冶取躍如星者淬以馬血成之傷一卽死刀劒以柔鐵爲莖幹不可純

用鋼純鋼不折則缺

天寶中交趾貢龍腦如蟬蠶老龍腦樹節方有禁中呼爲瑞龍腦上唯賜貴妃十枚香氣徹十餘步

蓬萊山使高麗者望之甚遠前後下峭拔可愛其島屬昌國縣其上平廣可以種蒔島人云蓬萊山仙人越弱水三萬里不應指顧間便見此外不復見山

馬緒謫潮得巨蟻長尺餘鹽漬之歸誇北人

兩頭蛇馬鼈食牛血所化

鳴鳩毛氏云桔鞠郭璞謂布谷鳴鳩毛氏云王睢郭璞謂鸚鵡斯毛氏云卑居又云鴉烏郭璞云小雀好羣飛毛云桑扈爲竊脂郭璞云爲青雀好盜脂

海州有人持一束黑物形如竹篾其人云海魚腮中毛可作屏

風貼色似水牛角頭似猪鬃長二尺四寸廣可一寸

人家有小蟲至微而響甚尋之卒不可見號竊蟲大如半胡麻形似鼠婦有兩角白色振其頭則有聲孟康朝作賦比之鬼魅海州有溝水通淮過漕船寶應中堰破水涸東海主脩堰堰成輒壞或說梁代築浮山堰以鐵數萬斤填積其下乃成堰之壞如雷聲至是聲聞上流蓋鐵味辛辛能害曰魚龍護目故畏鐵也有人淬劒于池池魚皆浮去

張勃吳錄曰彭澤有鳥接食團飯投之高下無失巫山迎船鳥亦然

凡鳥三指向前一指向後鸚鵡兩指向後

漢明帝永平五年長安迎取飛廉并銅馬置上西門外晉灼曰飛廉鹿身頭如雀有角而蛇尾豹文應劭曰飛廉神禽能致風

氣

宣王好射三石之弓而自以爲九石臣下從而悅之以非大王不能用其實三石也九石名而已

周官全羽爲旛析羽爲旌道路用旌節卽此旌也顧愷之畫蘇武所執之旌上圓如幢下復數層紅羽穆穆然如夜合花此析羽也今鹵簿中節頗類此其首亦圓相去尺餘有數重圓板以鰐牛尾綴之亦析羽遺法然蘇武漢節則旌節之制至于龍節虎節玉節之類則今虎符之類但可合符不必盡爲旌耳顧畫節首一物若書卷豈亦符乎漢銅符以銅爲之竹符以竹五寸鐫刻篆書其上

研譜載天下之研四十餘品以青州紅絲石研爲第一端州斧柯山石爲第二歙州龍尾石爲第三

夜藏飲食于器中覆之不密鼠欲盜食不可至環器而走淚滴器中食之得黃疾通身如蠟

鎗石類金碇砭類玉木蘭類桂奚醢類檀蛇牀類薜蕪人參類薺芑檜類柏狐狸類狗鸞鸞類鳳野馬類麟

肅宗時有告保定太守反者令李泌乘千里馬往案之千里馬寧遠所獻髮拳紫色狀如八駿乘者必衣裘冒絮似胡兒抱持早發扶風初馳三十里則皆旁側跳三十里外乃墜然而去唯聞耳傍風聲飛前蹄之士過耳辰時達保定申時歸奏事

顓帝有三子而亡去爲疫鬼其一居江水爲疫鬼其一居弱水爲魍魎其一居人宮室壅竭善驚人小兒

腳弱病用杉木爲桶濯足排樟腦兩股間以腳棚繫定月餘卽效

雜令曰蹄人者絆其足齧人者截其耳說文牛觸者角着橫木
有一狼子生平多逆父旨父臨死囑曰必葬我水中意其逆命
得葬土中至是狼子曰生平逆父命今死不敢違旨也破塚築
沙潭水心以葬

本草經曰虎嘯風生龍吟雲起磁石引鍼琥珀入芥漆得蟬而
散麻得漆而湧桂得蒸而軟樹得桂而枯戎鹽累卵獺膽分杯
其氣爽之相關感也

一曰偏記二曰小錄三曰逸事四曰鑠言五曰郡事六曰家史
七曰別傳八曰雜記九曰地理十曰都邑簿

唐大順元年六月資州兵王全義妻如孕覺物漸下入股至足
大捩痛甚拆而生珠如彈圓漸長大如杯

西京相璠曰京有小索亭世語以爲本索氏兄弟居又爲索水

晉志京有大索小索亭漢書京索之間也

紀信塚在滎陽城西北三里

漢長安巧工丁緩作臥褥香爐爐體常平又作七輪扇連七輪大皆徑尺一人運之滿堂寒戰今二法竝存

計然云人受命于天地變化而生一月而膏二月而脉三月而胚謂如水胞之狀四月而胎謂如水中鰕蜃胎也五月而筋六月而骨謂血氣變爲肉肉爲脂脂爲骨也七月而成形八月而動九月而躁十月而生

九章算法方田一粟米二差分三少廣四均輸五方程六傍要七盈足八鈎股九

語林云王中郎以圍碁爲坐隱或亦謂之爲手談又謂之爲碁聖

竇藪王叡云東方朔以爲寄生賣餅人結茅爲經以戴頭上狀如環

螭鬪精上有孔其中有子有泥食之殺人

露布捷書之別名以帛書揭之竿魏武奏事謂之露板

公孫龍以書有四目四聰遂以聽天地人爲臧之三耳臧善也以白馬非白馬教也其意若改其說無以教人

易之生物奇偶三才之數三三而九九九八十一主日日數十故人十月而生八九七十二偶以承奇奇主辰辰主月月主馬馬十二月而生七九六十三三主斗斗主狗狗三月而生六九五十四四主時時主豕豕四月而生五九四十五五主音音主猿猿五月而生四九三十六六主律律主禽獸故禽鹿六月而生三九二十七七主星星主虎虎七月而生二九一十八八主

風故蟲八月而化

陶谷子妻曰南山有豹霧雨七日不下食者欲以澤其衣毛而成其文章故藏以遠害

齊民要術曰梧桐山石間生者爲樂器則鳴

周書曰清明之曰桐始花桐若不華歲有大寒

太行卽五行之異名淮南子曰武王欲築宮于五行之山

猗頓魯之窮士耕則常寒聞朱公富往問術焉朱公曰子欲速富常畜五牾

童子操戈與孟賁戰孟賁必不勝童子脩禮盡敬雖孟賁不忍犯

鳩食桑甚則醉猫食薄荷則醉虎食狗則醉

管子曰聽宮如牛鳴窮中

牛聾瞶面牛鼓篋是也

積皂莢置油瓶其中永不蛀踏雞子殼令人患白癩風踐壞竈土令人害瘡

桑柴灰取汁煎白礬治壁鏡蛇毒石榴名天漿已乳石毒桃根爲印可召鬼

臥欲縮足不欲左脇

牖里在湯陰縣廣雅稱獄犴也夏曰夏臺商曰美里周曰囹圄皆圓土也

續博物志卷九終

續博物志卷十

舊說千歲之龜巢于蓮葉游于卷耳之上

按乾鑿度曰垂皇策者蓋伏羲用蓍卦已重矣然而世質民淳法惟用七八六十四卦皆不動若乾止于乾坤止于坤不能變也夏商因之皆以七八爲占連山歸藏是已後世澆薄始用九六爲占不如是不足以應天下之變

諸侯叛桀關龍逢引皇圖以諫桀桀殺之伊尹諫桀桀曰天之

有日如吾之有民日亡吾乃亡矣

與前志小異

紂剖比干觀其心桀殺龍逢無剖心之事桀惟比之于日紂乃詐命于天

西伯軍至鮪水紂使膠鬲候周師問曰西伯將焉之曰之薛膠鬲曰無我欺曰不予欺也將伐紂曰何日至曰以甲子膠鬲以

是日報紂是日雨甚卒病請休師西伯曰膠鬲已報其主以雨
進兵救膠鬲之死也商容與殷民觀周師之入見畢公曰吾新
君也容曰非也其人將有急色君子臨事而懼見太公曰吾新
君也容曰非也其人虎踞而鷹趾當敵將眾威怒自倍見利卽
前不顧其後故君子臨眾果于進退見周公曰吾新君也容曰
非也其爲人忻忻行休志在除賊是非天子則周之相國故聖
人臨眾知之見武王曰吾新君也容曰聖人爲海內討惡見惡
不怒見善不喜顏色相副以是知之

犀出越睽以陷甯取之每殺天震雷暴雨

野桑生石上取以爲弓不膠漆而利

淮南子曰鯀堙洪水盜帝之息壤帝使祝融殺之于羽淵今荆
州南門外有狀若屋宇陷土中而猶見其脊旁有石記云不可

犯舂鍤所入輒復如故又頗以致雷雨近代有妄意發掘水空出不可制

與前志小異

佛樓沙國有佛鉢受三斗許青玉也或曰青石或曰雜色而墨多四際分明厚可二分貧人以少華投中卽滿富人以多華正復百千萬斛終不滿或曰在月支國

穆天子傳曰天子賓于西王母乃紀其迹于弇山卽西王母之山

武王旣勝紂登邠之阜以望商邑曰自發未生六十年麋鹿在牧蜚鴻滿野徐廣乃引內史邊之言曰夷羊在牧張華以爲文王之詞曰水潦東流飛鴻滿野又曰自發未生之十年

與前志

小異

淮南子云亂之所生皆在流遁大興宮室延樓棧道雞棲井幹

側木構櫨以相支持木巧之飾此遁于木也

魏軍南伐朱脩之守滑臺城不下其母悲憂乳汁驚出乃號踴告家人曰我年老非有乳時今忽其不免是日城陷

帝王世紀堯時厨中自生肉脯薄如翼搖鼓則生風使食物寒而不臭

堯緝獬豸之皮以爲帝帳

嶺南溪洞中往往有飛頭者故有飛頭獠子之號頭將飛一日前頸有痕而項如紅縷妻子共守之及夜生翼飛去曉卻還

梵僧菩薩勝言闍婆國中有飛頭其俗所祠名曰蟲落因號落氏

河圖曰少室山大竹堪爲甌器山海經舜林中大竹一節可以爲船漢竹大者一節受一斛小者數升爲楫櫓廣志曰雲母竹

大竹也攤竹細而多刺也簋竹堪作笛簠竹宜爲屋椽篋竹皮青內白如雪軟韌可爲索

竹譜曰竹之類則六十有一

南越以孔雀珥門戶崑山以璞玉抵烏鵲

鷺避戊己蝠伏庚申一歲三蠶則桑弱馬耗

孔子曰違山十里蟋蟀之聲猶在于耳政事惡譁而善肅

蚯蚓長吟地中江東謂之歌女

木瓜味酢善療轉筋陶隱居云如轉筋時但呼楸名及書上木

瓜字輒愈

穀膠可以團丹砂又曰爲金石之漆

橘柚彫于北徙石榴鬱于東移

呂氏春秋曰善學者若齊王之食雞必食其跖數千而後可足

也

慕容瓌有馬跨四十九年駿逸不虧鑄銅爲之像親爲銘讚
撥拔力國有異獸名馳牛皮似豹蹄類牛無峯項長九尺身高
一丈餘

水麝天寶初虞人獲水麝詔養之臍中唯水漑滴于斗水中用
灑衣至敗香不歇每取以鍼刺之投以真雄黃香氣倍于肉麝
此與前說水麝小異併錄之

張華爲黃門侍郎博覽圖籍千門萬戶畫地成圖

司馬遷欲自成一家碯琢經傳之文以從世變可也至改古文
尙書論語可乎

楚王使屈原造爲憲令屬草藁未定上官大夫見而欲奪之原
不與讒之曰王使屈平爲令眾莫不知每一令出平伐其功以

爲非我莫能爲也王因是疏屈平

庚桑子出山人王士源采莊子庚桑篇爲之目云其先人于山中得古本唐人疑之竟不施行今亢倉子三卷是也

漢蜀人趙賓好異說以氣無箕子箕子者萬物蓂茲也顏師古曰古皆蓂箕同音

貴妃以假髻爲首飾曰義髻僖宗內人束髮甚急爲囚髻唐末婦人梳髮以兩髻抱面爲拋家髻

望梅生津食芥墮淚此五液之自外至也慕而垂涎愧而汗發此五液之自內至也

良常山有熒火芝大如豆夜視有光得食一枚心中一孔明食七枚七孔明可夜書華陽洞亦有五種夜光芝包山有白芝王獻云有書契以來便應有毫世傳蒙恬制非也崔豹曰蒙恬

以枯木爲管以鹿毛爲柱羊毛爲被所謂毫非今之竹兔也
元和中元稹使蜀營妓薛濤造十色彩箋以寄元稹于松花紙
上寄詩贈濤蜀中松花紙雜色流沙紙彩霞金粉龍鳳紙近年
皆廢唯餘十色綾紋紙尙在

湘州記蔡子池南有石臼是蔡倫舂紙臼

李司徒勉在汴州得異骨一節可爲研南海時得于海商云是
蜈蚣脊骨

蕭史與穆公鍊飛雪丹第一轉與弄玉塗之今之女銀膩粉也
三代以降塗紫草爲臙脂周以紅花爲之或曰出于閼氏
葛洪曰沈羲學道于蜀中與妻共載

管子曰武王爲侈靡令曰豹擔豹裘方得入廟故豹皮百金功
臣之家裘千種而未得一豹皮

陵陽子明經云春食朝霞日欲出時黃氣也秋食淪陰日沒以後赤黃氣也冬食沆瀣夜半氣也夏食正陽南方日中氣也并天黃地黃爲六氣

墨子作木鳶飛三日不集公輸子之雲梯墨子之飛鳶是也

今之紙鳶引絲而上令兒張口望視以洩內熱

同光中莊宗遣平蜀得王衍金銀命悉鎔之爲金塼銀塼約重三百斤一塼開一竅二人擔之上有匠人名曰馮高過荆南高季興曰馮高主屬我坑官持而有之儲爲一庫皇朝建隆中金銀入京師斤兩封緘如故

華俗謂上金爲紫磨金夷俗謂上金爲楊邁金

印子金世傳淮南王安藥金上有印子篆文劉主字壽州八公山土中耕者往往得之小餅重半兩有一印大餅至七兩有二

十許印

襄趙之間故春陵白水之地多得金麟趾裏蹠金趾中空四旁有文刻工巧裏蹠似于平物上滴成如乾柿土人謂之柿子金或曰此婁敬所爲藥金和藥最良

古玉器有奇特非雕琢人功者多是昆吾刀及蝦蟇肪所刻肪可得取肥者剉煎膏塗玉亦軟滑易截

冬瓜仁七升以絹袋盛之投三沸湯中暴乾如此三度苦酒浸一宿爲末日服方寸七令人不老

通天犀千歲者長且銳白星徹端出氣通天則能通神可破水駭雞矣抱朴子有白理如線者以盛米雞卽駭刻爲魚銜入水水開三尺

勒畢國人長三寸有翼善言語戲笑因名語國飲丹露爲漿丹

露者日初出有露汁如珠也

漢武習水戰作昆明池釣魚綸絕而去夢魚求去其鉤明日帝戲于池見魚銜索爲去之復游于池得珠一雙

東海員嶠山有冰蠶長七寸有鱗角以霜雪覆之始爲繭其色五綵織爲文錦入水不濡投火不燎

石決明亦名九孔螺

魚子合猪肝食之殺人

陳藏器云螾腳中髓及腦殼中黃並能續斷絕筋骨碎之微熬內創中筋卽連

方言云桂林之中謂守宮能鳴者以蛤蚧相似

蜘蛛網纏贅疣日消爛屢有驗

柚似橙而大于橘石蜜其實乳糖

芎藭不可久服令人暴死

藕與蜜同食可以休糧

淮口揚州出身梨蘇合香一兩酒一斗同煮極能調五藏

董藥者婆羅門云阿魏苗根似白芷

胡麻性與茯苓相宜卽巨勝

苦參爲齒藥使人傷腎腰重麪熱熱冷

棗與棘相類皆有刺

粳粟米五穀中最硬得漿水易化倉粳米炊作乾飯食之止痢

採芸香葉置席下能去蚤虱子

仙家謂醋爲華池左味

白髮鬚鑷去消臘點孔中卽生黑者

松脂杏仁棗肉茯苓等分食後服五十粒可不饑

有黃連桔梗勿食猪肉有茯苓勿食酢物有細辛勿食生菜
古無純銅作鏡者皆有錫雜之

巴豆神仙食一枚卽死鼠食三年重三十斤

麝金是毒蛇屎

徵姓舉事當忌亥日以火絕在亥

己日己年不殺蛇

段成式云神荼鬱壘領萬鬼

瘧鬼小不能病巨人故曰壯士不病瘧晉人曰君子不病瘧蜀
人以瘧瘧爲奴婢瘧

沈懷遠南越志曰珠有九品寸五分以上至寸八九分爲大品
有光彩一邊小平似覆釜者名璫珠璫珠之次爲走珠走珠之
次爲滑珠滑珠之次爲磊螺珠磊螺珠之次爲官雨珠官雨珠


之次爲稅珠稅珠之次爲蔥珠

元封二年大秦獻花蹄牛高六尺尾環遶角生四耳

阿薩部多蠟蟲鹿剖其肉重疊以石壓之瀝汁稅波期鬱林等國
草子釀于肉汁中經數日卽變成酒飲之可醉

方舟先生胸中有老氏藏書取張華博物志倣而續之蓋游戲
引筆以占其胸中藏書何如耳司馬子長敘孔子所以聖者而
記其辯商羊專車之骨等事或者謂此特子產之傳不宜以此
累夫子遷則陋矣而或者亦未之察也夫道固絕學然豈必漫
不省識一物而頽然以獨造耶詩識鳥獸草木之名易知鬼神
之情狀于道與有力焉子在川上所見者水而所取者道也具
此見以觀此書則幾矣門人迪功郎眉山簿黃公泰謹跋

人曰：僕于前年冬間，自京師出，歷訪名勝，而得此山。其地雖在荒僻，而其景則極其幽雅。山中有古松數株，其葉如針，其幹如臂，其皮如鱗，其色如琥珀。其間又有古石，其形如盤，其色如玉，其質如金。其間又有古碑，其文如畫，其字如龍，其意如雲。其間又有古塔，其形如瓶，其色如金，其質如石。其間又有古橋，其形如虹，其色如金，其質如石。其間又有古亭，其形如屋，其色如金，其質如石。其間又有古池，其形如鏡，其色如金，其質如石。其間又有古井，其形如瓶，其色如金，其質如石。其間又有古路，其形如帶，其色如金，其質如石。其間又有古園，其形如鏡，其色如金，其質如石。其間又有古山，其形如盤，其色如金，其質如石。其間又有古水，其形如帶，其色如金，其質如石。其間又有古風，其形如帶，其色如金，其質如石。其間又有古雨，其形如帶，其色如金，其質如石。其間又有古雪，其形如帶，其色如金，其質如石。其間又有古月，其形如帶，其色如金，其質如石。其間又有古日，其形如帶，其色如金，其質如石。其間又有古星，其形如帶，其色如金，其質如石。其間又有古雲，其形如帶，其色如金，其質如石。其間又有古霧，其形如帶，其色如金，其質如石。其間又有古雷，其形如帶，其色如金，其質如石。其間又有古電，其形如帶，其色如金，其質如石。其間又有古風，其形如帶，其色如金，其質如石。其間又有古雨，其形如帶，其色如金，其質如石。其間又有古雪，其形如帶，其色如金，其質如石。其間又有古月，其形如帶，其色如金，其質如石。其間又有古日，其形如帶，其色如金，其質如石。其間又有古星，其形如帶，其色如金，其質如石。其間又有古雲，其形如帶，其色如金，其質如石。其間又有古霧，其形如帶，其色如金，其質如石。其間又有古雷，其形如帶，其色如金，其質如石。其間又有古電，其形如帶，其色如金，其質如石。





續博物志

GR
335
L42
1875